

Pakar saran utama dos pertama vaksin

Kuala Lumpur: Pemberian dos vaksin pertama seharusnya diutamakan kerana ia mampu meningkatkan peratusan peningkatan perlindungan COVID-19 berbanding fokus kepada dos lengkap.

Pakar perubatan kesihatan awam, Universiti Putra Malaysia (UPM), Prof Madya Dr Halimatus Sakdiah Minhat, berkata tindakan berkenaan berjaya dilaksanakan di beberapa negara dan kerajaan seharusnya mempertimbangkannya jika stok vaksin tidak mencukupi.

"Pembukaan sektor tertentu juga harus berperingkat berlandaskan sasaran peratusan vaksinasi yang dilaksanakan. Pembukaan sektor industri serentak tidak selaras usaha kerajaan menurunkan angka kes COVID-19 kerana pasti ramai akan keluar bekerja dan berada di luar rumah tanpa perlindungan."

"Perintah Kawalan Pergerakan (PKP) 3.0 rata-ratanya seperti mengecewakan ramai pihak kerana ia jauh berbeza daripada PKP 1.0. Jika kerajaan benar-benar serius ingin menurunkan angka kes, ia perlu dilaksanakan dengan tegas untuk tempoh waktu dinyatakan."

"Memang agak sukar kerana ia membabitkan ekonomi negara, tetapi jika kita berjaya melandaikan kes, pada masa akan datang, tidak mustahil semua orang boleh menikmati kehidupan yang baik selepas ini dan tiada PKP lagi dilaksanakan," katanya ketika dihubungi, semalam.

Menegaskan kerjasama semua pihak amat diperlukan untuk membantu melandaikan keluk jangkitan COVID-19, beliau berkata, sekiranya sasaran peratusan vaksinasi sudah bertambah, pekerja juga boleh kembali bekerja ke pejabat secara berperingkat," katanya.

Profesor kesihatan komuniti, pengurusan hospital dan kesihatan, Universiti Kebangsaan Malaysia (UKM), Prof Dr Sharifa Ezat Wan Puteh, berkata pembukaan sektor industri dalam tempoh PKP 3.0 akan menyebabkan ramai berada di luar rumah.

Menegaskan perkara itu seperti tidak adil kepada rakyat biasa seperti peniaga kecil yang jelas bimbang untuk membuka perniagaan mereka, beliau berkata, sehingga kini kira-kira 70 peratus kluster membabitkan tempat kerja kerana banyak isu boleh dikaitkan.

"Akhirnya, ia tidak memberi kesan kepada PKP 3.0 kerana tindakan yang tidak seimbang ini. Sepatutnya, hanya industri berkepentingan dibenarkan buka dan mempunyai kuota kehadiran pekerja sebanyak 30 peratus yang bergilir-gilir datang ke pejabat."

"Sekiranya kebolehjangkitan (Rt) menurun, jumlah pekerja ke pejabat juga boleh ditambah secara berperingkat," katanya menambah, keperluan sanitasi tempat awam juga perlu ditingkatkan terutama di kawasan berisiko bagi mengurangkan penularan dan menghindar penyakit lain," katanya.